

INUIT ATAQATIGIIT

INATSISARTUNI



Nuuk, 28. maj 2013

Inatsisartut Suleriaasianni § 37 naapertorlugu Naalakkersuisunut imaattunik apeqquteqar-punga.

(Inatsisartuni ilaasortaq Naja Nathanielsen, Inuit Ataqatigiit)

Apeqqutit:

1)

London Miningip qinnuteqaataa Aatsitassat pillugit inatsit, Suliniutit annertuut pillugit inatsit tamaasaluunniit tunngavigalugit suliarineqassava?

2)

Aatsitassat pillugit inatsimmi aamma Suliniutit annertuut pillugit inatsimmi ersippoq qinnuteqaatinut atatillugu Naalakkersuisut Inatsisartut akuutit-tassagaat. London Miningimit qinnuteqaat pillugu qaqugu Naalakkersuisut Aatsitassaqaarnermut Ataatsimiititaliaq ilisimatilersaarpat?

3)

Suliniutit annertuut aamma Aatsitassat pillugit inatsisini Inatsisartunik peqataatitsinissaq pillugu aalajangersakkat siunissami Naalakkersuisut qanoq iliorlutik nalinginnaasumik piviusunngortilersaarpat¹?

4)

**Soq aatsitassat qinngornernik ulorianartunik akullit pillugit arlaannaan-
nulluunniit attuumassuteqanngitsumik nalunaarusiaq, Lett, DCE aamma PWC-
mit suliaq, maanna tamanut saqqummiunneqarani danskit naalagaaffiallu
ataqatigiissareqqaarnissamut utaqqinneqarniarpa?**

Tunngavilersuut:

Apeqqutit saqqummiunneqarput Inuussutissarsiornermut Aatsitassanullu Naalakkersuisup 21. maj tusagassiortunik katersuutsitsinermini paasissutissiinerinut qisuariaatit.

Inuiaqatigiinni aalajangiinissanut pingaarutilinnut naleqqiullugu ammanerunissaq innuttaa-sunillu akuutitsinerunissaq arlaqartunit kissaatigineqarpoq.

Taamaammat paasisinnaanngilara, uranimik piiaaneq pillugu nalunaarusiap saqqummiun-nissaa Naalakkersuisut utaqqisinniarmassuk, taannami Inatsisartut siuliinit suliakkiissu-taagaluarpat. Naalakkersuisut saqqumiinissap danskit naalagaaffiallu ataqatigiissarnissaa kissaatigaat. Imaakkaluarpoq Inatsisartut tassaallutik Naalakkersuisut sulisitsisui, danskit naalagaaffiat pinnani. Nalunaarusiap saqqummiunneratigut paasissutissat Inatsisartunit, tusagassiuutinit NGO-nillu arlaqartunit piumaneqartut pissarsiarissagaluarpagut.

Tusagassiortunik katersuutsitsinermi Jens Erik Kirkegaard ilisimatitsivoq, London Miningip qinnuteqaataata suliarinera piaartumik naammassissasoq ilimagineqartoq. Taamaammallu aperivunga Naalakkersuisut qaqugu Inatsisartut peqataatinnialerneraat, inatsisini allassi-

¹ Aatsitassat pillugit inatsimmi § 4, imm. 2 aamma Suliniutit annertuut pillugit inatsimmi § 7, imm. 8

masutut. Ukiakkut ataatsimiinnermi Aatsitassat pillugit inatsit allanngortinneqarpoq. Aalajangiunneqarpoq Naalakkersuisut Inatsisartut ataatsimiititaliaat attuumassuteqartoq ilisimatittassagaat suliani "inuiaqatigiinnut avatangiisinulluunniit pingaarutilimmik sunniuteqartussani". Oqaasertaliussat taakku assingajaat suliniutit annertuut pillugit inatsimmi atorineqarput, tassani allaqqagami Naalakkersuisut Inatsisartut ataanni ataatsimiititaliaq attuumassuteqartoq ilisimatittassagaat, ingerlatseqatigiiffimmut akuersissummik tunnius-sisoqartinnagu.

Siumoortumik kissaatigissavara apeqqudit tamarmik ullut suliffiit qulit qaangiutsinnagit akineqareernissaat.